



**Asunto:** Implantación dos novos ciclos formativos de Formación Profesional Básica (FPB), cofinanciada no 80% polo FSE.

No Diario Oficial de Galicia do 26 de agosto de 2014 publicouse a Orde do 14 de agosto de 2014 pola que se regula o acceso e a admisión aos ciclos de formación profesional básica e se autoriza a súa oferta para o curso 2014/15.

Na referida norma, no seu artigo 2. *Oferta formativa*, recóllese o seguinte: "Os ciclos de formación profesional básica de oferta obrigatoria autorizados en centros públicos para o curso 2014/15 son os que se relacionan no anexo V desta orde. Serán cofinanciados polo Ministerio de Educación, Cultura e Deporte, e o Fondo Social Europeo no marco do Programa Operativo de Emprego, Formación e Educación".

Efectivamente, a implantación dos novos ciclos de FPB será cofinanciada polo Fondo Social Europeo, no marco do obxectivo temático 10 "Investir en educación, formación e formación profesional para a adquisición de capacidades e unha aprendizaxe permanente", artigo 9 do Regulamento (UE) nº 1303/2013 do Parlamento Europeo e do Consello de 17 de decembro de 2013, polo que se establecen disposicións relativas aos fondos estruturais.

A dotación do FSE será achegada polo Ministerio de Educación, Cultura e Deporte con cargo ao Programa Operativo Plurirrexional de Emprego, Formación e Educación, correspondente ao período de programación 2014-2020. A taxa de cofinanciamento para a Comunidade Autónoma de Galicia é do 80 por cen. O Ministerio achegará tamén os fondos correspondentes ao cofinanciamento, polo 20 por cen restante.

Neste momento o Programa Operativo está en fase de aprobación pola Comisión Europea, seguramente non se aprobe ata o primeiro trimestre de 2015. Dende a Administración educativa débese garantir que, dende o inicio do curso escolar, estas medidas cumpren cos requirimentos regulamentarios dos procedementos de xestión do FSE para o período 2014-2020 e coas vixentes instrucións da Unidade Administradora do Fondo Social Europeo (UAFSE), co obxecto de garantir a elixibilidade dos gastos incorridos ao FSE. Os procedementos deben implantarse antes do desenvolvemento material das actuacións, aínda que non se aprobara o PO, nin que se tivera designado ao organismo intermedio, xa que así o esixe o Regulamento (UE) 1303/2013, nos seus artigos 65.6 e 125.3.

Unha das tarefas realizadas pola Consellería de Cultura, Educación e Ordenación Universitaria foi identificar as operacións que poden ser obxecto de cofinanciamento do FSE atendendo á programación da oferta da Comunidade Autónoma recollida na Orde do 14 de agosto de 2014. A operación defínese como un centro que imparte un ou varios grupos de primeiro de FPB.



Realizada a identificación das operacións remitíronse ao Ministerio de Educación, Cultura e Deporte para a súa aprobación.

Unha vez estudadas as propostas de operacións e os criterios de selección que se utilizaron para a súa identificación, o Ministerio nos comunica que ese centro é unha operación seleccionada para implantar os novos ciclos formativos de FPB e que, polo tanto, vai ter financiamento para os gastos de profesorado e de funcionamento, achegado nun 80% polo FSE e nun 20% polos fondos propios do Ministerio.

### **Información e publicidade.**

Os centros educativos informarán, ao comezo de cada curso escolar, a todos os alumnos e alumnas sobre a contribución dos fondos estruturais da Unión Europea á redución e a prevención do abandono escolar temperá e ao fomento da igualdade de acceso a unha educación infantil, primaria e secundaria de boa calidade, incluídos os itinerarios de aprendizaxe formais, non formais e informais encamiñados a permitir a reintegración no proceso de educación e formación.

Moi especialmente, informarase ao alumnado que curse ciclos formativos de Formación Profesional Básica, xa que os seus ciclos van financiarse nun 80% pola Unión Europea a través do Fondo Social Europeo.

Tamén se fará extensible ao profesorado que imparta esas ensinanzas.

Nos espazos nos que se imparta a citada formación e na documentación relacionada con esta ensinanzas, deberá aparecer o logotipo do FSE, coa lenda "O FSE inviste no teu futuro".

Santiago de Compostela, 12 de novembro de 2014

O DIRECTOR XERAL DE EDUCACIÓN, FORMACIÓN  
PROFESIONAL E INNOVACIÓN EDUCATIVA



Manuel Corredoira López

Sr./Sra. Director/a do centro educativo